

□लोकगाथा

हर्ष-जीण री लोकगाथा (अंस)

पाठ परिचै

राजस्थान रै सीकर जिलै रै मांय लूँठा पहाड़ां माथै हर्ष अर जीण माता रा जगचावा मिंदर है। जीण रौ मूळ नांव जीवणी हौ, जिकी घंघराय री बेटी ही। घंघराय चूरू जिलै रै घांघू गांव रा राजपूत सरदार हा। आं रै अेक बेटी अर अेक बेटी जलम्या। बेटी रौ नांव हर्ष हौ अर बेटी रौ जीण। जीण रौ बाळपणै रौ नांव जीवणी हौ। दोनू भाई-बैन में अणूतौ हेत हौ। हर्ष अर जीण रा मां-बाप आं रै बाळपणै में ई सुरग सिधारग्या, पण सुरगधाम जावण सूं पैलां हर्ष नैं भोळावण देयनै गया कै जीण नैं किणी भांत रौ दुख नैं होवणौ चाईजै। पर-घर सूं आवण वाळी भावज (भोजाई) उणनैं किणी भांत रा फोड़ा नैं भुगतावै। म्हां दोन्यां रा जीव इणी भोळी चिड़कली री चिंत्या में अटक्योड़ा है। तद हर्ष आपरै मां-बाप नैं पतियारौ दिरावै कै थे नचींता रैवौ, म्हेँ म्हारी बैन नैं फूल री दाई राखूँला, इणमें किणी भांत रा फोड़ा नैं पड़ण देवूँला।

मां-बाप रै सुरगवास पछै हर्ष रौ ब्यांव होवै। केई दिनां ताई तौ नणद-भावज में हेत-हिंवाळस बण्यौ रैवै, पण फेर भावज रै मन मांय खोट बापरै अर वा नणद नैं आडा-टेढा बोल बोलती रैवै। जीण घुटती-अमूझती रैवै, पण भाई नैं कीं नैं बतावै। अेक दिन तळाब सूं पाणी रा मटका लावती वेळा भावज आपरी नणद जीण सूं कैयौ कै थूं म्हेँ मटकौ ऊंचादै, थनैं दासी ऊंचा देसी। जीण बोली, “थानैं घणौ गुमान है म्हारै भाई माथै, जद इज अैड़ा बोल बोल्या हौ, म्हेँ तौ दासी रै हाथां मटकौ आज ऊंचूं न काल!” भावज बोली, “म्हारा इज काळा चाब्योड़ा हा, जिकौ अैड़ी आफत सूं भेंटा होया, ठाह नैं, कद आगलै घरै जासी, कै भाई इज रैयसी?” भावज रा अैड़ा बोल सुणनै जीण उणी खिण खण ले लीन्यौ कै नैं तौ म्हेँ कदैई ब्यांव करूंली अर नैं पाछी घरां बावडूंली। जीण नैं बठै इज छोडनै भावज दासी सागै पाछी घरां आयगी। जीण नैं नैं देखनै हर्ष नैं चिंत्या होयी तौ जीण री भावज कैयौ कै जीण तौ रूसणौ करनै सरवर रै कांठै ई रैयगी है। हर्ष इतौ सुणतां ई भाजतौ-न्हासतौ सरवर पूयौ तौ बठै जीण नैं ही। उण रा पग दिखणादी दिस कानी मंड्योड़ा दीठा तौ वौ उणरै पगां-पगां सरपट्यौ। थोड़ी दूर गयां पछै उणनैं जीण निगै आई। वौ उणनैं मनावतौ थकौ पाछी घरां चालण री मनवारां करी, पण जीण कैयौ कै चायै परकत आपरा नेम-कायदा बदळ देवै, पण म्हेँ म्हारै कौल-बचन सूं पाछी नैं टळूं। इणी सरवर रै कांठै भावज साम्हीं सूरज भगवान री साखी में म्हेँ जकौ खण लियौ है, उणनैं निभावूंली। हर्ष उणनैं घणी ई समझायी अर कैयौ कै मां-बाप नैं मरती वेळा म्हेँ बचन दियौ हौ कै जीण नैं कदैई कोई दुख नैं होवण देवूँला। थारै वास्तै ऊजळा चावळ, हरिया मूंगां री दाळ अर भूरी भैंस रै घी रौ जीमण परोसूंला। रतनां सूं जड़्योड़ी चौकी माथै सोनै रौ थाळ अर पालर पाणी सूं भरवायनै झारी रख देवूँला। पछै आपां बैन-भाई सागै जीमांला अर बीच-बीच में गासिया ई बदळांला।

जीण कैयौ कै अबै तौ जे आगलै जलम में अेक ई मां रै पेट सूं जलम लेवांला, तौ भलां ई सागै जीमांला, इण जलम में तौ अैड़ौ कीं ई नैं होवैलौ। अैड़ौ सरंजाम तौ अबै भावज सारू ई करौ। चायै सिखर चढ्योड़ौ सूरज पाछौ मुड़ जावै, पण म्हेँ तौ अबै पाछी नैं चालूं। जीण रौ पक्कौ निश्चै जाणनै हर्ष अेकर फेरूं मनावणौ चायौ, तौ जीण कैयौ कै भाई हर्ष, थूं म्हेँ कांई मनावै, म्हेँ तौ आखी दुनिया मनावैली, राजा-बादसाह मनावैला। थूं पाछौ घरां बावडजा। भोजाई थारी बाट देख रैयी होसी। हर्ष ई मन में धार लीनी कै जे जीण नैं मुड़ै तौ म्हेँ ई पाछौ नैं मूड़ूं। जीण रै सागै हर्ष ई दिखणादी दिस आगै बधतौ रैयौ अर सीकर कनै दो लूँठा भाखरां माथै जायनै तप करण लाग्या। जीण कैयौ कै बैन-भाई आम्हीं-साम्हीं नैं बैठ्या करै, तद हर्ष जीण नैं पीठ देयनै तप में लीन होयग्यौ। दोनू भाखर

हर्ष-जीण रै नांव सूं ओळखीजण लाग्या। बटै हर्ष अर जीण रा मिंदर बणग्या। जीण माता रौ जस दिल्ली रै बादसाह ताई पूग्यौ तौ वौ मिंदर माथै चढाई कर दीनी। जीण माता आपरै भौरां री सेना बादसाह रा तंबुआं में भेज दी। बादसाह रा सिपायां रा डील सूजग्या। वै डरता पाछा बावड़ग्या। दिल्ली रौ बादसाह जीण माता नैं धोकण लागग्यौ। हर्षनाथ रै मिंदर कनै वि. सं. 1030 (बुधवार, 18 जनवरी, 973 ई.) रौ अक सिलालेख मिल्यौ, जिकौ सीकर रै संग्रहालय मांय है। इणमें केई चौहान राजावां रा नांवां रौ जिकर है। जीण माता रै मिंदर रा पुजारी पारासर गौत रा बिरामण अर सांभरिया खांप रा राजपूत है। अठै आयै बरस चैत अर आसोज रै च्यानण-पख में मेळौ भरीजै अर जात-झड़लै सारू सेंग जात रा लोग आवता ई रैवै। कैबत है कै 'जिण न देखी जीण, वौ जग में के कीण?' मतलब कै जकौ जीण माता रा दरसण नीं कर्या, वौ जग में आयनै काई कर्यौ?

हर्ष-जीण री लोकगाथा (अंस)

(सरवर कांठैं सूं दर-कूचां—दर-मजलां दिखणद कानी जावती जीण आपरै भाई नैं झूरै ही—)

हरसा बीर मेरा रे, मा बाबल खोस्या मेरा राम।
जामण का रे जाया, जलमी को जायो भावज खोसियो॥
हरसा बीर मेरा रे, मेरा कुळ में कोई साथी नांय।
जामण का रे जाया, अंबर तो पटकी रे धरती सांभळी॥
हरसा बीर मेरा रे, जे मेरी होती जुग में माय।
जामण का रे जाया, अखन कंवारी नै नांय बिडारती॥
हरसा बीर मेरा रे जे मेरो जीतो होतो बाप।
जामण का रे जाया, अखन कंवारी नै कदियेन काढतो।
हरसा बीर मेरा रे, राव गढां रे करतो ब्याव।
मेरी मा का रे जाया, घुड़ला तो हसती रे देतो घूमता॥
हरसा बीर मेरा रे, मा बाबल आवै म्हारै याद।
जामण का रे जाया, नैणां चौमासो रे म्हारै लग रह्यो॥

(हे भाई हर्ष! मां-बाप नैं तौ भगवान खोस लिया अर सागी भाई नैं भावज। अबै इण घर में म्हारौ कुण है? म्हनैं तौ आभौ पटकी अर धरती झेली। हे भाई, जे आज मां जीवती होवती तौ आपरी अखन कंवारी बेटी नैं इयां नीं बिसारती अर जे बापू होवता तौ घर सूं कदैई नीं काढता। वै किणी गढपति सागै म्हारौ ब्यांव करनै हाथी-घोड़ा दायजै में देता। हे म्हारा मा-जाया भाई हर्ष! म्हनैं मा-बाप याद आय रैया है अर आंख्यां सूं सावण-भादवै री झड़ी लाग रैयी है।)

हरसा बीर मेरा रे, के थारै घर में रै पांती मांगती?
के थारो लेती राज बंटाय?
जामण का रे जाया, किस विध बिडारी रै छोटी भाण नै॥
हरसा बीर मेरा रे, कै तो मैं लेती धरम की चूनड़ी।
के तो मैं लेती आंगी बांय।
मेरी मा का रे जाया, देतो तो लेती रै पगां री मोचड़ी॥

(ज्यूं-ज्यूं जीण नैं आपरौ अपमान चेतै आवै, त्यूं-त्यूं उणरी रीस बधती जावै अर वा भाई सूं किरियावर करती थकी कैवै— हे भाई हर्ष! न तौ म्हैं घर में अर न राज में ई पांती मांगी, फेर क्यूं छोटी बैन नैं घर सूं काढी? म्हैं तौ थारी दियोड़ी चूनड़ी, कांचळी अर ज्यादा सूं ज्यादा अेक जोड़ी पगरखी ई लेवती।)

हर्ष री जोड़ायत जद घरां पूगी, तद उणरै आपरी बैन नैं नीं देखनै हर्ष पूछ्यो कै जीण कठै रैयगी? तद नण-भोजाई रै झगड़ै रौ हाल सुण-समझनै हर्ष आपरौ माथौ पीट लियौ अर तळब कानी भाज्यौ। बठै जायनै जीण रै पगां री दिस दिखणाद कानी जोयौ। फेर उणी दिस दौड़ पड़्यौ—

इसड़ा तो झुरणा ये जीण सगती झूरती गई,

गई कोस दोय रै च्यार।

देव्यां रा ये देवी कांकड़िये ढळता ये हरसो नावड़्यो।।

जीण मेरी बाई ए मुड़ मुड़ तूं घर नै पाछी चाल।

मेरी मां की ये जाई, हरसो तो ऊबो करै ये मनावणा।।

(इण भांत भाई नैं ओळमा देती-झूरती जीण नैं गांव री कांकड़ सूं कोई च्यारेक कोस रै आंतरै हर्ष नावड़ली अर बोल्यौ, “हे देव्यां री देवी जीण, पाछी घरां चाल! हे जामण-जायी बैन, थारौ भाई हर्ष थनै खड़्यौ-ऊभौ मना रैयौ है। पण जीण तौ काठी धार राखी ही। वा दर ई नीं मानी अर बोली—)

हरसा बीर मेरा रे मनै मनासी रै बामण-बाणियां।

और मनासी कुळ रा लोग,

मेरी मा का रे जाया, बेटी मनासी रे हाडे राव की।।

हरसा बीर मेरा रे मनै मनासी राजा मान।

जामण का रे जाया, और मनासी रे दिली रो बादस्या।।

(हे म्हारा भाई हर्ष, थूं म्हनै काई मनासी, म्हनै तौ मनासी आखो राज-समाज। बामण-बाणियां रै सागै आखै कुळ रा लोग म्हनै मनावैला। हाड़े राव री बेटी अर राजा मानसिंह ई म्हनै मनावैला। अबै हर्ष करै तौ काई करै? वौ बैन री सुख-सुविधावां सारू कौल वचन करण लाग्यौ।)

जीण मेरी बाई ये, उजळा रंधाद्यूं ये थानै चावळ्या,

हरिये मूंगां री बाई नै दाळ,

जामण की ये जाई घोरत घलाऊं ये भूरी झोट को।।

(हे बैन, थारै सारू ऊजळा चावळ अर हरिया मूंगां री दाळ रंधवा देवूला। सागै भूरी भेंस रौ घी भी परोस देवूला, पण जीण तौ सेंग सुख-सुविधावां सूं मूढौ फेर लियौ हौ। वा बोली—)

हरसा बीर मेरा रे, भावज जीमैली उजळा चावळ्या,

भावज जीमैली थारी दाळ।

जामण का रे जाया, घोरत जीमैली रे भूरी झोट को।।

(हे भाई, ऊजळा चावळ, हरिया मूंगां री दाळ अर भूरकी भेंस रौ घी भावज ई जीमसी। जीण रा अँड़ा बोल सुणनै हर्ष रै हियै में हेत हबोळा लेवण लागै। वौ कैवै—)

जीण मेरी बाई ये चोकी ढळवा द्यूं रतन जड़ाव की,

ऊपर लगवा द्यूं सुबरण थाळ।

जामण की ये जाई, झारी भरवाद्यूं ये पालर नीर की॥
 जीण मेरी बाई ये ऊंचो सो घालूं ये थानें बैसणूं,
 बैनड़ भाई जीमांला साथ॥

जामण की ये जाई, बिच-बिच बदळांला ये बाल्हा गासिया॥

(हे बैनड़ जीण, थारें खातर रतनां सूं जड़्योड़ी चौकी ढळवायनै उण माथें सोनै रौ थाळ सजायनै पालर पाणी
 री झारी भरवास्यूं। ऊंचा आसण बिछायनै आपां दोनूं भेळा जीमांला अर बीच-बीच में अक-बीजै नैं कवा ई देवांला।
 पण जीण हिमाळै दाई थिर ही। वा ठिमराई सूं बोली—)

हरसा बीर मेरा रे जे ओजूं जलमां रै अकै माय के,
 जद रे जीमांला दोन्यूं साथ।

मेरी मा रा रे जाया जद रे बदळांला बिचला गासिया॥
 हरसा बीर मेरा रे आकां कै लागै रै मतीर।
 जामण का रे जाया, फोगां कै लागै रे चाये काकड़ी॥
 हरसा बीर मेरा रे, खेजड़ियां लागै चाये बोर।
 जामण का रे जाया, झाड़ां कै रे लागै चाये सांगरी॥
 हरसा बीर मेरा रे, पीपळ कै लागै चाये आम।
 जामण का रे जाया, आमां रै लागै चाये पीपळी॥
 हरसा बीर मेरा रे, फिरजावै कुदरत का साचल नेम।
 जामण का रे जाया, मेरा वाचा पाछा ना फिरै॥
 हरसा बीर मेरा रे, सिखर आयोड़ो रे सूरज मुड़चलै।
 समै भी गयोड़ो मुड़ जाय॥
 मेरी मा का रे जाया, जम पर गयोड़ा रै भंवरा मुड़ चलै।
 हरसा बीर मेरा रे, बादळ री बूनां रै पाछी मुड़ चलै॥
 समदर हूं नदियां पाछी जाय,
 जामण का रे जाया, जीण आयोड़ी रै पाछी ना मुड़े॥

(हे मां-जाया भाई हर्ष, अबै तौ जे आगलै जलम में ओजूं अक ई मां रै पेट सूं जलमांला, तद ई अकै सागै
 जीमण जीमांला अर आपस में गासिया ई बदळांला। जीण आपरौ अटळ निरणै सुणावती बोली— हे भाई हर्ष, चायै
 आकड़ै रै मतीरा लागै, फोगां रै चायै काकड़ी लागै, खेजड़ी रै बोरिया अर झाड़ां रै सांगरी ई क्यूं नीं लागै, पीपळ
 रै चायै आम अर आम रै चायै पीपळ-फळ लागै। हे भाई हर्ष, चायै कुदरत रा नेम-कायदा टळ जावै, पण जीण आपरै
 कौल-बचनां सूं पाछी नीं टळै। चायै सिखर चढ्योड़ौ सूरज पाछौ मुड़ जावै, गुजरेड़ौ समै ई पाछौ बावड़ आवै अर
 चायै जमराज कनै गयोड़ा जीव ई पाछा आय जावै। हे भाई, चायै बादळां री बूदां पाछी मुड़ जावै अर समदर सूं
 नदियां पाछी बावड़ जावै, पण जीण पाछी किणी सूरत में नीं बावड़ै। वा आपरै बचनां माथें थिर है। जद हर्ष नैं पक्कौ
 पतियारौ होयग्यौ कै अबै जीण पाछी घरां नीं चालैली, तद वौ उणरै रूसणै रौ कारण जाणणौ चायौ—)

जीण मेरी बाई ये के थानें काढी भावज गाळ।
 जामण की ये जाई, के थानें दीन्या ये ओळमा॥

(हे बाई जीण, काई थनै थारी भावज गाळ्यां काढी या थनै किणी तरै रा मोसा मार्या ? तद जीण बोली—)

हरसा बीर मेरा रे, सौगन में खाई सरवर पाळपर,
आडो तो लीनूं सूरज देव ।
जामण का रे जाया, भावज को चाढ्यो रे कळंक उतारस्यूं ।।
हरसा बीर मेरा रे, एकण ओदर में रे दोन्यूं लोटिया,
एकै मायड़ को रे चूख्यो दूध ।
जामण का रे जाया, अकै पालणियै रे दोन्यूं झूलिया ।।
हरसा बीर मेरा रे, अकै आंगण में रे दोन्यूं खेलिया,
एकै बाटकियै पीयो दूध ।
मेरी मा का रे जाया, एकै थाळकली रै सागै जीमिया ।।
हरसा बीर मेरा रे, बैनड़ भाई रो गाढो नेह ।
जामण का रे जाया, परघर की दूती रे आय तुड़ाइयो ।।

(हे भाई हर्ष, म्हें सरवर री पाळ माथै सूरज री साखी में सौगन खाई ही कै भावज रो लगायोड़ौ कळंक उतारूंली । हे भाई, आपां दोनूं अक ई मां रै पेट में लोट्या, अक ई पालणै में हींड्या, अक ई कटोरी में दूध पीयां अर अक ई थाळी में जीमण जीम्यो, पण हे भाई, परायें घर सूं आयोड़ी दूती जैड़ी भावज आपणै गाढै हेत नैं तोड़ नाख्यो । जीण रा अँ उद्गार सुणनै हर्ष गळगळ्यो होयग्यो । उणरी आंख्यां सूं चौसारा चालण लागग्या । वौ संकळप कर्यो—)

जीण मेरी बाई ये ! इतणी निसासी ये बैनड़ क्यूं हुई ?
हरसो तो चालै थारै साथ,
जामण की ये जायी, चाल बसांला ये बनखंड डंगरां ।।

(हे म्हारी बैन जीण ! थूं इत्ती अणमनी क्यूं होवै हैं । म्हें खुद थारै साथै हूं अर आपां वनखंड अर भाखरां में ई चालनै रैवास कर लेवांला ।)

हरसा बीर म्हारा रे, कुण करैलो थारौ राज ?
जामण का रे जाया, कुण तो रुखाळैलो पिरजा बापड़ी ।
हरसा बीर मेरा रै, मुड़ मुड़ पाछो घर नै जाय ।
जामण का रे जाया भावज बिलखै रै थां बिन अकली ।।

(हे म्हारा भाई हर्ष, जे थूं म्हारै सागै चालैला तौ थारौ राज कुण संभाळैला ? हे जामण जाया बीर, फेर इण भोळी प्रजा नैं कुण रुखाळैला । इण वास्तै हे हर्ष वीरा, थूं पाछौ मुड़जा अर घरां जा परौ, थारै बिना घरै भावज बैठी अकली झुर रैयी हैं ।)

गाथा में आगे बैन जीण आपरै भाई हर्ष नैं घणौ ई समझावै, पण वौ नीं मानै अर सेवट बैन-भाई दोनूं भाखरां माथै अपूठा बैठ तपस्या में लीन व्है, आपरी आतमावां रौ उत्सर्ग करै अर भाई-बैन रै अटूट नेह रै प्रतीक रूप जग में पूजीजै ।

अबखा सबदां रा अरथ

खण=प्रण। भोळावण=संभळावण। गासिया=कवा, रोटी रौ कौर। कांठौ=किनारौ, सरवर री पाळ। भावज=भोजाई, भाई री जोड़ायत। बिडारणौ=बिसारणौ, भूलणौ। घुड़ला=घोड़ा। हसती=हाथी। चौमासो=चातुर्मास, बिरखा रुत रा चार महीना। मोचड़ी=पगां री पगरखी, चमड़े री जूती। झूरणौ=विलाप करणौ, बिलखणौ। घीरत=घी। झोट=भैंस। रतन जड़ाव=रतनां सूं जड़योड़ी। सुबरण=सोने रौ, सोनलियो। पालर नीर =बिरखा रौ पाणी। वाचा=कौल, बचन। जम=जमराज। बूनां=बूदां, बिरखां री छांटां। पिरजा=प्रजा, रैयत, जनता।

सवाल

विकळपाऊ पडूत्तर वाळा सवाल

- हर्ष अर जीण कठै रा पहाड़ां माथै तपस्या करी ?
 (अ) सीकर रा (ब) आबू रा
 (स) देसूरी रा (द) चित्तौड़ रा
 ()
- जीण माता रौ बाळपणै रौ नांव काई हो ?
 (अ) जोती (ब) जतिया
 (स) जीवणी (द) जसोदा
 ()
- जीण आपरै भाई हर्ष नैं पाछी घरां जावण सूं क्यूं नटै ?
 (अ) मां-बाप नीं होवण रै कारण (ब) भावज नैं दियोड़ा कौल-बचनां रै कारण
 (स) हर्ष नैं दुख होवण रै कारण (द) दासी री सिकायत रै कारण
 ()
- “के थारो लेती राज बंदाय ?” हर्ष-जीण री लोकगाथा में आ बात कुण किणनैं कैवै ?
 (अ) बैन आपरै भाई नैं (ब) लुगाई आपरै धणी नैं
 (स) दासी आपरी राणी नैं (द) टाबर आपरै माईतां नैं
 ()

साव छोटा पडूत्तर वाळा सवाल

- ‘हर्ष-जीण री लोकगाथा’ में हर्ष रौ जीण सूं काई रिस्तौ है ?
- पाणी भरण नैं सरवर री पाळ माथै कुण-कुण सागै जावै ?
- हर्ष अर जीण पहाड़ां माथै जायनै तपस्या सारू किण तरै बैठै ?
- हर्ष ई घरां पाछौ जावण सूं क्यूं नट जावै ?

छोटा पडूत्तर वाळा सवाल

- हर्ष अर जीण रै बाळपणै री दो घटनावां लिखौ।
- ‘हर्ष-जीण री लोकगाथा’ सूं आपां नैं काई प्रेरणा मिळै ?

3. जीण नैं उणरी भावज काई मोसा बोल्या हा ?
4. घर सूं निकळ्यां पछै हर्ष नैं जीण किण ठौड़ मिळी ?

लेखरूप पडूतर वाळा सवाल

1. 'हर्ष-जीण री लोकगाथा' रौ सार आपरै सबदां में लिखौ।
2. "हर्ष-जीण री लोकगाथा भाई-बैन रै अछेह नेह री बानगी है।" इण कथन नैं लोकगाथा सूं दाखला देयनै पुख्ता करौ।
3. जीण नैं घरां पाछी ले जावण सारू हर्ष काई-काई मान मनवार करै अर जीण आपरै कौल-बचनां सूं नीं टळण सारू काई-काई दाखला देवै ? दाखलां समेत विस्तार सूं लिखौ।

नीचै दिरीज्यां पद्यांसां री प्रसंगाऊ व्याख्या करौ।

1. हरसा बीर मेरा रे, मा बाबल खोस्या मेरा राम।
जामण का रे जाया, जलमी को जायो भावज खोसियो।।
हरसा बीर मेरा रे, मेरा कुळ में कोई साथी नांय।
जामण का रे जाया, अंबर तो पटकी रे धरती सांभळी।।
2. इसड़ा तो झुरणा ये जीण सगती झूरती गई,
गई कोस दोय रै च्यार।
देव्यां रा ये देवी कांकड़िये ढळता ये हरसो नावड़यो।।
जीण मेरी बाई ए मुड़ मुड़ तूं घर नै पाछी चाल।
मेरी कां की ये जाई, हरसो तो ऊबो करै ये मनावणा।।
3. हरसा बीर मेरा रे, पीपळ कै लागै चाये आम।
जामण का रे जाया, आमां रै लागै चाये पीपळी।।
हरसा बीर मेरा रे, फिरजावै कुदरत का साचल नेम।
जामण का रे जाया, मेरा वाचा पाछा ना फिरै।।